

NDỌ EYEN-ERỌŃ

Eriyarare 19:1-21

ỌYỌHỌ UKPEP-ŃKPỌ 464

Eke Ikpọ Owo

IKỌ IBUOT: “Ke ufọt okoneyo efiori ete, Sese, ọdọ-ndọ! mbufo ewọñọ eka ekosobo ye enye” (Matthew 25:6).

I Ekwọ Hallelujah Ke Heaven

- 1 Mbon ikwọ ke enyọñ enọ Abasi itoro ke abañá edinen ubierikpe Esie, Eriyarare 19:1-3
- 2 Mme ikpọ owo ye mme ńkpọ-uwem ekpono Abasi ńko, Eriyarare 19:4

II Udia Ndọ

- 1 Ọyọhọ itoro emi enọde Abasi ke ofuri emana edida itie ke ini enọde ntọt ke abañá Ndọ Eyen-erọñ, Eriyarare 19:5, 6
- 2 Ẹwan Ndọ Eyen-erọñ, otim idem ebeñe enyuñ esine enye afia ọfọñ, Eriyarare 19:7, 8; Matthew 25:3, 4, 7
- 3 Ọfọfọn ọnọ mmọ emi ekekotde edi ndọ, Eriyarare 19:9; Matthew 25:10
- 4 Angel esin ndibọ ukpono, Eriyarare 19:10

III Mbon-ekọñ Egoro Ke Mfia Enañ-Mbakara

- 1 Jesus Christ edi ada-ibuot udim ekọñ Heaven, Eriyarare 19:11-16
- 2 Ekot kpukpru mme inuen enyọñ ete edita obukidem mmọ emi ediwotde ke Ekọñ Armageddon, Eriyarare 19:17, 18; Ezekiel 38:17-20
- 3 Mme ndiọi odudu esobo idem ọtọ kiet man eñwana ekọñ, Eriyarare 19:19; 16:16
- 4 Eyen-erọñ enyene ọyọhọ erikan, Eriyarare 19:20, 21

SE EKPEPDE EBAÑA

Nnyin idu ke Emaná Edisana Spirit. Abasi ọmọdọñ Spirit Esie utom ke ererimbot ete ediyom Ẹwan-ndọ ọnọ Eyen Esie. Ke ini Ẹwan-ndọ editimde idem esie ama, ke ini ńkanika Abasi edinyuñ ọwọñọrede okosim ini emi Enye okonimde, Ebe-ndọ, kpa Jesus Christ eyebiñọre ke enyọñ ndida Ẹwan-ndọ Esie nnyọñ. Do ndien udia Ndọ Eyen-erọñ eyeda itie ke ikpa-enyọñ ke ini Akwa Ukut akade iso mi ke isọñ. Ntak edi oro itie edikot ńwed ọdọhọde ete, “Ọfọfọn ọnọ mmọ emi ekekotde edi udia ndọ Eyen-erọñ.”

Toto ke mme emana, uduak Abasi ke abañá usuñ erifak ye mme edinam Esie ye owo ayarade. Nnyin imokut nte ediwak ntiñ-nnim Ikọ Abasi ewọrọde esu. Abasi ọkọnọ Ibet ye mme anditiñ ntiñ-nnim ikọ; ndien, ke edikem ini, Enye ọnọ Eyen Esie ete edi uwa ke abañá mme idiok-ńkpọ nnyin. Ema esin Enye, ekọñ Enye ke eto, edi ke ọyọhọ usen ita Enye ọtọñọ ntak eset ndien idahaemi, Enye etie ke ubọk nnasia Abasi anam mkpe-ubọk abañá nnyin. Kpukpru mme edinam emi edi ubak ke uduak Abasi emi ama okododu toto ke eritọñọ, inyuñ idighe edifiak nneñere ke baba usuñ kiet se Abasi akaduakde ndinam ke abañá erinyaña owo. Enam kpukpru ikpehe ke uduak oro ke abañá emana emi ndien ayak esisit eyekure.

Nnyin emi idude ọtọñọde ke ini Pentecost imenyene ifet eke okponde akan eke mmọ emi ekebemde nnyin iso, koro nnyin imokop ikot Edisana Spirit nte Enye odukde ke ofuri ererimbot ndiyom Ẹwan-ndọ nọ Eyen Abasi. Nnyin imokut Ukperedem Edim nte ọduhọde ke mme iñwañ mfri emi ema ekedat ema. Mme anditiñ ntiñ-nnim ikọ ye mme ndinen owo ema eyom ndikut mme ńkpọ emi nnyin ikutde, edi mmọ ekekut ke enyin mbuotidem ikpọñ nte mme ńkpọ eke enyenede ndidi. Ke ini oro okodu ke anyan usuñ. Nnyin imokut nte eñwañade Edisana Spirit edori mmọ emi ebọde erinyaña ye edinam-asana enyuñ enyenede udọñ ebaña eridi Ọbọñ. Mmọ ema edu ke mbeñidem, oto ke ndisaña ke uñwana Ikọ Abasi ye ke ndibọ ńkpọ-ekọñ emi Abasi ọnọde.

Mme Ọfiok-ńkpọ Ye Ndisime Nditọ Iban

Ke Matthew ibuot 25, nnyin imenyene utibe ukpep-ńkpọ ke abaña ndinam mbeñe-idem ndibuana ke Udia Ndọ Eyen-erọñ. Ẹke nditọ iban duop osio ndise nditọ iban ition owut emi ekebeñede idem ebet ọdọ-ndọ ye ition emi mikebeñeke idem. Kpukpru mmọ ekedu ọtọ kiet, edi ekesio mme ọfiok-ńkpọ ke otu mme ndisime eduk ke esit ufọk mbemiso eberi usuñ. Kpasuk ntre ke edidi ye Ẹwan-ndọ Christ, kpa mmọ emi ebeñede idem ndidok ke eridi Jesus, eyetañ mmọ esio ke otu mmọ emi ekande mmọ ekuk. Ndinyene ifiok nte ke Ọbọñ ekpere ndidi inọhọ owo unen ndibe nduk ke enyin usuñ. Mmọ emi ekamade Aran ke ekpeme ye utuen-ikañ mmọ ikpọñ edibe eduk.

Ini mbeñe-idem eyebe ke adañemi edifioride ete, “Sese ọdọ-ndọ! Mbufo ewoño eka ekesobo ye enye.” Eridi Ọbọñ ntiene Ẹwan-ndọ Esie eyesọp nte emireñ-mireñ otode ke edem usiaha-utin ọwọrọ ayama osim edem usop-utin, edinyuñ otibe ke ini eke owo midorike enyin, koro Ikọ Abasi ọdọhọde ete, “Ke ini eke mbufo midorike enyin, Eyen Owo eyedi.” Eyeberi usuñ.

Ikwo Heaven

Nti ye inem ikwo edi se ediwak owo emade mi ke isọñ, ndien mme ikwo emi etiñ ikọ enọ mme owo, okposuk edi nte mmọ etode nsio-nsio idut ye usem. Inem ikwo edi ńkpọ eke ọnọde ukpọñ nnyin idaresit. Edi uyo ikwo Hallelujah emi ke Heaven edidi itoro emi akande kpukpru mme ikwo itoro emi nditọ Abasi esinọde, mme ekwođekwo mme ewetdewet ke ofuri emana. Nnyin ikwo ibaña Enye mi, se Enye akanamde, nte Enye edifiakde idi ye se Enye edinamde; edi ikwo enye emi, ke ekwođekwo me etiñditiñ, ediwoṛọ oto ke inua ediwak owo ke Heaven, ndien edidi mme owo emi editañde edok ekedu ke enyoñ ke nsinsi ye Ọbọñ, edikop inem ikwo oro. Nso utọ inem ikwo! Nnyin iyomke nditaba enye.

Ndọ Oro

Idighe kpukpru mmọ emi edinyañade ke ata akpatre emi edinyuñ ekade Heaven ke akpatre, edibuana ke Udia Ndọ Eyen-erọñ. Inaha owo ndomo kiet okop mmem-idem ke ikọ emi mfin emi, okposuk edi edide ntre, edi kpukpru owo enyene unen ndibeñe idem ndidi kiet ke otu Ẹwan-ndọ. Owo ndomo kiet idibohoke ubiom-ikpe edieke enye etrede ndisaña ke uñwana emi ayamade ọnọ enye ke eyo esie; ke ntre edi unen ye utom kpukpru owo Abasi mfin emi ndisaña ke ofuri uñwana emi enye ekemede ndinyene. Abasi idikpehe ikpe inọ mbon eyo oko nte emi Enye edikpede ọnọ mbon eyo emi; ke ntre edi se ifonde owo kiet-kiet ndida ifet emi mbọ se Abasi onimde, emi edide erinyaña, edinam-asana ye Uduok-mmọñ Edisana Spirit ye ikañ, nnyuñ nsaña ke ofuri uñwana emi odude ke Ikọ Abasi.

Joel, anditiñ ntiñ-nnim ikọ ama etiñ: “Ndien ama ekem ke ini ńkpọ emi ebeye, nyeñwaña spirit mi nno ofuri obukidem; ndien nditọ iren mbufo, ye nditọ mbufo iban eyetiñ prophecy, mbiowo mbufo eyedaba ndap, mkparawa mbufo eyekut ńkukut. Nyenyuñ nñwaña spirit mi ke eyo oro nno ifin-iren ye ifin-iban mbufo” (Joel 2:28, 29). Nnyin ineñere idu ke ukperedem ini, imonyuñ ikut nte ntiñ-nnim ikọ emi esude ke eyo nnyin. Emi edi Ukperedem Edim emi ekenode nditim Ẹwan-ndọ Christ idem. Inaha inọ ibat-ibat owo ikpọñ, edi enyene ofuri owo, iban ye iren, ifin iban ye iren (emi ayarare owut ete enyene mbon inyene ye mme ubuene ukem-ukem). Ke ini Abasi akanamde ńkpọ ye Israel ke eyo oko, Enye akanam ńkpọ ye mmọ nte idut emi edide akpan inyene Esie, ndien nditọ ufọk mmọ emi eketode mme idut efen ekenyene unen nte nditọ ufọk ikpọñ-ikpọñ. Edi idahemi, owo eke amade ekeme ndidi kiet ke otu Ẹwan-ndọ Christ.

Nnyin ifiokke kpukpru se iditibede ke Udia Ndọ Eyen-erọñ, edi imọdiọño ite ke Ẹwan-ndọ eyediana kiet ye Enye emi amade ukpọñ esie ke nsinsi (Ikwo Solomon 5:16); Enye emi okonimde enye ọnọ Idemesie, (Hosea 2:19, 20); Enye emi ọdọhọde ete, “Mmọñ ńka nkotim itie nnim nno mbufo. Ndien nyefiak ndi ndida mbufo nno Idem Mi” (John 14:2, 3); Enye emi okowutde ufọk Abasi ima Esie ke ini Enye ọkọbọñde akam, “Man mmọ kpukpru ekpekam edi kiet, nte Afo, Ete, odude Mi ke idem, Ami nnyuñ ndude ke Afo; man ima emi Afo akamade Mi odu mmọ ke esit, Ami nnyuñ ndu mmọ ke esit” (John 17:21-26). Enye emi Ẹwan-ndọ ekenamde akpanikọ enọ, ekebọñde akam enyuñ edude ke utom ebet tutu Ebe-ndọ mmọ afiak edi mi ke isọñ, (Mme Ẹke 31:10-31). Enye ada ubok esie anam kpukpru ńkpọ emi enye okutde ndinam nte anam ọnọ Ọbọñ. Ifet kiet ekededi eke Abasi ọnọde enye, enye ada anam ńkpọ ke ofuri esit ye odudu, nte ńkpọ eke enye okopde ikọ oto Jesus ete, “Nam enye”, ndien atuak ada do ekpeme tutu utom oro okure; inamke enye ndinem owo esit, edi anam nte utom eke Abasi oyomde oto enye, emi Enye edinode enye utip. Ẹwan-ndọ eyediana ye Ọbọñ, Ebe esie, “koro Andibot fi edide uberi; Jehovah mme udim edi enyiñ esie. Andifak fi onyuñ edi Edisana Abasi Israel” (Isaiah 54:5).

Christ ke Idemesie eyenam n̄kpọ ọnọ ikọt Esie ke ini Udia-ndọ Eyen-erọn, n̄ko, imekere ite ke emi edidi ini emi edinọde owo mme utip ke utom akpanikọ mmọ. Nte ededi, edi ata akpan ini ndiwuk enyin nse nte ini akwa edidiọn.

Utiti

Ke ini Udia Ndọ Eyen-erọn okurede, ke Akwa Ukut edinyuñ osimde utiti mi ke isọn, Ọbọn eyefiak edi ke odudu ye ke akwa ubọn. Ke akpa ini, Enye ekedi ke suñ-suñ ido ye ke nsuhọre-idem, edi ke ini enye emi, Enye edidi ndisio usiene nnọ mmo emi ekewotde, mme anditiñ ntiñ-nnim ikọ ye nti ikọt Abasi. Etiñ ebaña emi nte ini eriyarare Idem Esie, editoñọ ntak n̄wut idem ke idak eridi Esie ọyọhọ ikaba. Akpa eridi Esie edidi ke obubit enyọn ndikot N̄wan Esie n̄ka ke Ndọ Eyen-erọn. Ibọhọke mmọ emi ekeyetde ọfọnidem mmọ asana edikut Enye ini oro. Ke eriyarare Esie, Enye ediwat nte Ada-ibuot ke udim ekọn Heaven, ndien kpukpru enyin eyekut Enye.

Enye edidoro ke afia enañ-mbakara ye kpukpru mmọ oro edidude ke otu udim ekọn itiene Enye. Ndien ekọn Armageddon eyeda itie ke ini oro. Emi edidi ekọn edinen-ido, ndien nsobo emi editode ke ekọn oro edidi ubierikpe Abasi. Christ eyewuk Obio Ubọn Esie ke ererimbot emi, onyuñ akara mme idut ke esañ ukwak. Emi edidi ukara edinen-ido ke tọsin isua kiet. Eyebọp Unam oro ye anditiñ ntiñ-nnim ikọ nsu, emi ekebiañade mmọ emi ekebọde idiọnọ unam, etop mmọ esin ke mkpọdiọhọ ikañ emi asakde ye brimstone.

Ke ini Christ ediyararede idem, mme Jew eyese Enye emi mmọ ekekimde enyuñ enyime Enye nte Messiah mmọ. Mmọ eyebọn akam enyuñ eseme eyom Enye ke ini Akwa Ukut oro, emi n̄ko etiñde ebaña nte ini ukut Jacob. Mbuk mmọ enyene ndik adaña didie tọnọ nte mmọ ekekọn Ọbọn ke eto! “Enye ekedi ke ebiet Esiemọ, edi mmọ emi edide iman Esiemọ idarake Enye. Edi kpukpru owo eke edarade Enye, Enye ọnọ mmọ unen ndikabare ndi nditọ Abasi” (John 1:11, 12). Nti ikọt Abasi emi ekesañade ye Christ efiake edi ye mme mmọ emi ekebighide ibuot ke ntak ikọ-ntiense mmọ ke ini Akwa Ukut emi ekenyuñ enamde eset, eyekara enyuñ eda ubọn ye Christ ke ini Ukara tọsin isua.

Kpa nte Noah ye ufọk esie ekenamde mbeñe-idem ndibọhọ nsobo ke ini mmọn Ukwọ, kpa ntre ke N̄wan-ndọ Christ enam mfin. Mbon eyo Noah ema ekop ke utọn mmọ edi esit mmọ ikọfiokke se ọwọrọde. Mfin emi, mme owo ekop Ikọ Abasi ete ke Ọbọn ke edi, edi mmọ iyakke Ikọ emi oduk esit mmọ, ndien ke ntak emi, “mmọ idiọnọke” ete ke idibighike, Ọbọn eyebiọnọre. Ebat mmọ emi ebeñede idem nte mmọ emi “ediwak n̄kpọ atakde mmọ ke ererimbot emi,” edi, ekom enyene Abasi, koro oro edi se mmọ ekpade utom ebaña. Idibighike Ọbọn eyedọhọ ete, “Ikọt mi, mbufo eka ekeduk ke mme ubet mbufo, enyuñ eberi itim mbufo ebaha idem mbufo: edibe ini esisit ntem, tutu ikpahesit ebe. Koro, sese, Jehovah ọmọn oto ke ebiet esiemọ ọwọrọ, ete inọ ererimbot ufen ibaña mme idiok ido mmọ: ndien isọn eyeyarare iyip esie, idinyuñ ifukke aba nditọ esie emi ekpañade afai” (Isaiah 26:20, 21).

Eyak nnyin isọnọ iñwana ndibuana ke Udia Ndọ Eyen-erọn, ndien do ke ididu ke otu mmọ emi edifiakde edi ndikara ye Enye ke tọsin isua.

MME MBUME

- 1 Ini ewe ke Ndọ Eyen-erọn edida itie?
- 2 Ewe n̄ke ekpep nnyin ete ke edi akpan n̄kpọ ndinyene Aran ke mme ekpeme nnyin?
- 3 Anie edikara ererimbot emi ke ini Akwa Ukut?
- 4 Anie edikara ererimbot emi ke ini Ukara Tọsin isua?
- 5 Ke ini ediyarare idem Christ, nso iditibe inọ unam oro ye anditiñ ntiñ-nnim ikọ nsu?
- 6 Nso ididi ntak emi mbon ikwọ edikwọde ke Heaven?
- 7 Mme anie edibuana ke Udia Ndọ Eyen-erọn?
- 8 Anie edidi andideme udia ke ini Udia Ndọ Eyen-erọn?